

Centers da cumpetenzza a favur da l'economia

Pled d'avertura per la sessiun da zercladur

■ **(anr/fa) Voluntad, perseveranza, disciplina e cumpetenzza sociala: Quellas qualitats dovran las giuvnas ed ils giuvens per avair success en scola, professiun ed era cun giugar ballape.**

«Quests dis s'auza la curva da temperatura dals fans da ballape causa il campiunadi en Frantscha adina puspè», ha constatà il president dal cussegl grond *Vitus Dermont* glindesdi cun tegnair il pled d'avertura per la sessiun da zercladur. Ils «stars» dal ballape han tenor el duvrà bler engaschament, perserveranza, curaschi, disciplina ed er ina detga purziun fortuna per avair tant success ch'els pon giugar tar quest campiunadi. «Tar il ballape grischun na guardi betg or uschè bain causa ch'i mancan ils juniors», ha'l menziunà, «ina raschun po bain esser il svilup demografic als ultims decennis cun adina damain uffants.» Dermont ha numnà dentant er anc in auter motiv: «La voluntad da far part dad in'uniun e da s'engaschar cuminaivlamain cuntrafa al spiert dal temp nua che mintgin decida individualmain e subjectivamain.»

«**Tuttas duas vias professiunalas en bunas**»

Era per avair success en la professiun dovri tenor il president dal cussegl grond disciplina, perseveranza, voluntad ed era cumpetenzza sociala. Quai vala tant per far in emprendissadi sco er il gimnasi. Dermont ha menziunà la tendenza da blers giuvenils, e lur geniturs, da crair ch'in emprendissadi valia damain ch'in gimnasi. «Quai è ina faussa conclusiun, tant pli che la premeabilitad è ozendi dada sur las scolas autas spezialisadas.» El haja legi d'acurt davart la nova manadra da l'Institut Otalpin a Ftan, ha'l ditg, «sco che quella ha ditg vul l'IOF augmentar ils proxims

onns il dumber da scolaras e scolaras da 76 sin 100 fin 120. Quai signifitga in cumbat per ils medems giuvenils.» Dermont ha menziunà era la scola claustrala da Mustér che saja en tshertga da chaus.

Bleras plazzas d'emprendissadi anc betg occupadas

I saja da guardar da sustegnair ils giuvenils e geniturs che sajan surdumandads cur ch'els ston prender suenter la scola obligatoria la decisiun per lur ulteriura scolaziun. Dermont ha constatà che tuttas duas vias pretendian bler dals giuvenils.

«Actualmain èsi, tenor l'enquista da l'Uffizi grischun per la furmaziun professiunala, en Grischun stgars 40 scolaras e scolaras che nun han anc chattà nagina soluziun tge far suenter avair finì la scola obligatoria», ha ditg il president dal parlament grischun. Da l'autra vart èn passa 600 plazzas d'emprendissadi en chantun anc betg occupadas. Quai signifitga tenor el che las interpresas ed ils gimnasis cumbattian er vinavant per part per ils medems giuvenils. «Per nus che purtain la responsabladad politica vul quai perquai dir

d'elavurar er en l'avegnir conscienziusamain directivas e cundiziuns da basa e da las applitgar correctamain e precautamain.» In sector da furmaziun d'alta qualitat saja d'impurtanza centrala per l'economia, ha accentuà Dermont. Cun plirs centers da cumpetenzza per differentas professiuns, repartids en l'entir chantun, pudessan ins, a ses avis, trair a niz meglier il potenzial existent. «Uschia fissan nus innovativs e pudessan ademplir meglier las aspectativas da l'economia areguard las persunas spezialisadas necessarias.»



Il president dal cussegl grond *Vitus Dermont* ha punctuà l'impurtanza dal sector da furmaziun per l'economia chantunala.